

DEO OPT. MAX. UNI ET TRINO, VIRGINI DEIPARÆ, ET SANCTO LUCÆ ORTHODOXORUM MEDICORUM PATRONO.

QUÆSTIO MEDICA

QUODLIBETARIIS DISPUTATIONIBUS MANE DISCUTIENDA

IN SCHOLIS MEDICORUM, DIE JOVIS XXV. JANUARI.

M. JOANNE CORDELLE Doctore Medico, Præfide.

An Cephalæ venarum jugularium sectio?

UT Principis Regia esse solet aliorum ædibus instructior, ita caput Rationis animæ facultatum regni domicilium, cæteris corporis partibus est longè elaboratius; quæcumque illarum singulæ complectuntur, hoc solum complectitur omnia: in sui medietate cerebrum recondit viscerum ut excellentissimum, cujus substantia sequax & cerea, magnæ glandulæ non abfimis, innumeris vasorum rivulis irrigua, quatuor sinibus, quos plexus choræidis propagines interius percipiunt, excavata, duplici membranarum involucro circumtecta est, quibus cranium, seu osseum valium, & ipsum propriâ membranâ, aliisque communibus tegumentis obvolutum, fornicis in modum circumjicitur. Mirum profectò in multiplici adeò structurâ naturæ artificium, sed quò elaboratius, eò in morbos proclivius; hinc caput nulli non patet morborum generi: laborat proprio vitio; laborat alieno; dum excipit quiddam impuri male moratæ partes infernæ efferunt sursùm: hinc universæ molis spurcicies, nervorum irritatio, ductuum infarctus, oppletio ventriculorum, membranarum oblatio, à quibus errores mentis, spasmi, cataphorici affectus, cephalalgia, quæ frequentiores eò sunt ac acerbiores, quò major & exquisitior in capite nervorum ac membranarum apparatus.

DOLORUM capitis non unus idemque modus, sed varia multiplexque ratio. Cephalalgia modò tenetur caput, modò Cephalæa. Illa potius sequitur efficiens causæ vehementiam; hæc potius vitium & infirmitatem causæ suscipientis: scilicet quæcumque Cephalæam procreat efficiens causa, ea semper levis est ac imbecillis, ac longè mitior quàm quæ Cephalalgiam parit. Hinc Cephalææ contumacia major, nam quicumque morbi à causæ suscipientis imbecillitate sobolescent, ij longè graviore contumacioreque existunt, quàm qui sequuntur vim efficiens. Cephalæa dolor est capitis consuetus, ægrè cedens, inveteratus, qui parvis ortus initiis, savissimas habet exacerbationes. Qui eà tenentur neque adstantium strepitus ferre possunt, neque vel leviores loquentiam furros, non luminis splendorem, non potionem vini, non caput ferientes odores, non agitationem vel minimam sustinere. Ob doloris magnitudinem otium quærunt ac tenebras, ut quibus veluti malleo caput pertundi videatur, aut eas, quæ circa caput sunt, membranas quasi distendi ac divelli: iisdem aures sonant; oculi rubore perfunduntur; venæ frontis distenduntur; rubor faciem occupat, nec rarò usque ad oculorum radices dolor extenditur.

CEPHALÆÆ inducendæ non sufficit Dyscratia: id solum quod sentientium in capite partium continuitatem solvit, ejus est causa: Aer nempe sive ab igne, sive à sole calidior, frigus nimium; ventus Aquilonaris ac Austrinus, odor gravis; percussio, ictus, casus, humor aut vapor biliosus, acer ac membranas feriens, dolorem parit acrem erodentem, ac veluti perforantem; gravantem frigidus ac pituitosus, flatuum aut humorum mitiorum experientia, qui inter calvam & pericranium, vel inter calvam duramque meningem se se insinuant, easque membranas diducunt ab ossè, distendentem; sanguis tenuis ac biliosus, imò & spiritus redundans, quo distentæ ac turgentes arteriæ pulsant vehementius membranarum concutiunt, pulsantem. Sic pro causarum varietate varia multiplexque Cephalææ idea ac species, cujus impetus experitur, quisquis minùs cautè se gerens, ejus causas congerit intra se; hinc sexus uterque quolibet tùm anni, tùm ætatis tempore Cephalææ obnoxius; fœminæ tamen frequentius eà tentantur, ob desidèrii vivendi rationem & nimiam in alendis ac ornandis capillis diligentiam.

CEPHALÆA, chronicus affectus, longas polliceri videtur inducias, sed fucatas & fallaces, quibus non nisi ignavis fidat & imprudens: incautos sæpiùs in terrore plenos affectus præcipitat; commotus agitatique spiritibus, vigilias accersit insuperabiles; eversâ cerebri œconomia delirium parit ac insaniam; humore in oculos prolabente cæcitatem inducit; eodem cerebri substantiam imbuente, aut reticulos opplente, Apoplexiam, nervos obstruente, ac spirituum commeatibus impediende Paralyssim affert, Lethargum si putrescat, Epilepsiam si malignè corrumpatur. Occasio igitur etiam in Cephalæâ præceps, ac summum in morâ periculum. Medicus statim opitulatrice adhibeat manus: ad sanguinis missionem tutissimam illam morborum omnium anchoram, quàm citò intrepidèque confugiat: sanguis ex utraque Cephalicâ, virium habitâ ratione, subinde detrahendus & clivis paulò acrioribus alvus proluenda; venarum, quæ ad malleolum sunt, sectio, propter nimiam distantiam vix quidquam promovere par est: Ranuncularum sub lingua venarum divisio ob exiguitatem inutilis: Cucurbitulæ, rubificantiæ, scarificationes, capillorum deraasio, vix ullius sunt momenti: purgantia etiam validiora impactam materiam adurerent; Errhina spiritus redderent concitiores: utramque paginam adimplebit venarum jugularium sectio in Cephalææ curatione nunquam prætermittenda.

METICULOSUS nimium, qui jugularium sectionem reformidat, ipsis veterinariis familiarem; peritus Chirurgus qui eam administret, advocetur: collum non confringat arctius, ne præfocet, sed laxam ex ratione ligaturam circumducatur, ut sanguis hoc pacto non guttatim, sed rivulosè erumpere queat. Vultus sit non amplum, non parvum, sed mediocre: non transversum, sed obliquum. Ubi sanguis erit sistendus, amoveatur ligatura, & statim ejus fluxus inhibebitur: nullâ emplastri mastichini, nullâ suture necessitate, si ex arte vas fuerit apertum. Venæ jugulares internæ sunt aut externæ: Externæ sub cute sursum repentes, capitis partibus externis prospiciunt: internæ ad trachæ Arteriæ latera descendentes, ac in crassam meningem ejusque sinum desinentes, consulunt internis: magnum inter utrasque commercium est, adeoque, si in Cephalæâ externæ aperiantur, affectus, sive internus, sive externus fuerit, in propriis latibus jugulabitur: humor morbi parens viâ maximè certâ ac perbrevis, haud dubiè foras protrudetur; revulsio fiet ac derivatio; Seri agrestioris, ac bilis fervidioris, componetur Orgasmus: quibus, ut exeat acriores fuligines ac ferocientes spiritus, referabuntur ostia. Quid plura? uno remedio omne in persanandâ Cephalæâ negotium adimplebitur.

Ergo Cephalææ venarum jugularium sectio.

DOMINI DOCTORES DISPUTATURI:

M. Antonius le Moine.

M. Guido Crescentius Fagon, familiæ Regine Medicus ordinarius.

M. Jacobus de Bourges.

M. Petrus Legier.

M. Nicolaus Robin.

M. Franciscus Sorand.

M. Germanus Preaux.

M. Franciscus Blondel.

M. Jacobus Renaut.

Proponebat Lutetiæ CLAUDIUS MARILLIER, Neocastrensis, A. R. S. H. MDCLXXIV.